

ՄԱՆԱԶԿԵՐՏԸ ԲՅՈՒՋԱՆԴԱ-ԱՐԱՐԱԿԱՆ ՀԱԿԱՄԱՐՏՈՒԹՅԱՆ ՈՒՈՐՏՈՒՄ

(IX դարի երկրորդ կես—X դար)

Է. Ա. ԴԱՆԻԵԼՅԱՆ

Բյուզանդիայի նվաճողական քաղաքականությունն իր բոլոր երանգներով արտահայտվել է հատկապես Հայաստանի և նրան հարևան երկրների հանդեպ: Այդ քաղաքականության առավել ցայտուն դրվագներից է Դավիթ Կյուրապաղատի միջոցով Հայաստանի զգալի մասին տիրելու Հիշյալ ակտի իրադրածման ուղղությամբ Վասիլ II-ը, շատ լավ տիրապետելով Բյուզանդիայում դարեր շարունակ մշակված նվաճողական քաղաքականության «արվեստին», Վարդ Սկլերոսի (976—979) ապստամբության ծանր ժամանակաշրջանում կրկնակի շահավետ քայլի է դիմում. «Վասիլ թագաւորն Յունաց զԹոռնիկ զօրավարն, որ էր յազգէն Վրաց, արեղայ և սուրբ լերինն՝ հանեալ առաքէ առ կիրապաղատն Տայոց Դաւիթ. և խոստանայ տալ նմա զԽաղտոյառիճ Կղէսուրան, զՋորմայրի և զԿարին, զԲասեան և զՍևուկ բերդակ, որ է Մարդաղի, զՀարբ և Ապահունիս (զորս և ետ իսկ), որպէս զի զօր առաքեսցէ, յօգնականութիւն նմա: Եւ կիրապաղատին Դաւիթ գումարեալ զզօրսն Վրաց, և զիշխանաց իշխանն զՋոշիկ տայ զկնի Թոռնկայ՝ պատերազմել ընդ Վարդայ բռնակալին: Որք սկսեալ ի Տայոց աշխարհէն՝ քանդեալ աւերեցին զամենայն աշխարհն Յունաց, որ ընդ ձեռամբ բռնակալին», — գրում է Ասողիկը¹:

Դավիթին խոստացվող հողերից կայսրությանն էին պատկանում «Խաղտոյառիճ Կղէսուրան» [Խաղտոյառիճը և Բռնակապանը մինչև Բասենի արևմրտյան սահմանը ընկած լեռնանցքների սիստեմը (կղեսուրք), որը հայտնի էր «Իլլիրիա» (հմմտ. — Աղորի) անունով], Ջորմայրին, Կարինը, Բասենի այն մասը, որը գտնվում էր Մուրցից հարավ և «զՍևուկ բերդակ, որ է Մարդաղի» (Մարդաղի գավառը Սևուկ բերդակով, որը շատ կարևոր ռազմական նշանակություն ունեցող վայրում էր կառուցված և պահպանում էր Երասխի արմունկից վեր Հավճիչ բերդի պահպանած առաջին գետանցից հետո երկրորդ գետանցը)²: Ապստամբության տարիներին կայսրությունը փաստորեն զրկվել

¹ «Ստեփանոսի Տարօնեցւոյ Ասողկան Պատմութիւն Տիեզերական», Ս. Պետերբուրգ, 1885, էջ 192—193:

² Հավճիչը Երասխի աջ ափին էր՝ «Աղորի աշխարհում», որը ընկած էր Մարդաղի, Դասնավորք և Հավնունիք գավառների միջև և, իհարկե, կազմված էր այդ գավառների՝ Երասխի ափամերձ շրջանում գտնվող համապատասխան մասերից: «Աղորին» ֆիզիկա-աշխարհագրական միավոր էր ռազմա-ստրատեգիական նշանակությամբ և այդ տեսակետից պատահական չէ, որ նշված գավառների համապատասխան շրջանները միասին վերցրած կարող էին «Աղորի» նշանակել, որը, ինչպես ցույց ենք տվել, համապատասխանում է Halōras, Halūris [ն. Ադոնցը ենթադրում է, որ այն կարող էր ծագել հայերեն Оlor-ից (*Ալոր—Է. Դ.), տե՛ս Н. Адонц, Армения в эпоху Юстиниана, Ереван, 1971, էջ 11, ծան. 3], Ἰλλυριοί (Ἰλλυρία) անվանը՝ կապված կղեսուրքների՝ լեռնային ամրությունների տարածման շրջանների հետ [ՀՍՀՍ ԳԱ «Լրաբեր», (հաս. գիտ.), 1973, № 10, էջ 66]:

էր մինչ այդ իրեն անցած նշված տիրություններից, սակայն դրանք Դավիթին խոստանալու ավելի իրական հիմքեր ունեն, քան Հարթը և Ապահունիքը, քանի որ այս երկուսը կարճ ժամանակահատվածներով էին նվաճված եղել և կայսրությանը ենթակա էին դիտվում քաղաքական այն դոկտրինայի համաձայն, ըստ որի «այն քաղաքները և շրջանները, որոնք գտնվում էին կամ գտնվում էին կայսրության վասալների (իմա՝ հայ Բագրատունիների) գերագույն իշխանության տակ, դրանով իսկ Բյուզանդիային ենթակա են դառնում»³:

Արաբների կողմից Հայաստանի՝ Բյուզանդիային անցած մասին տիրույունը հետո կայսրությանը միայն X դարի 20-ական թթ. վերջերից է հաջողվում իր ազդեցությունը որոշ չափով տարածել վանա լճից հյուսիս ընկած շրջանների վրա: Իսկ մինչ այդ, Աշոտ I Բագրատունուց սկսած, դրանց վրա ունեցած սյուզերենական իրավունքները կայսրությունը հաստատում էր նշված սկզբունքով, ըստ որի՝ իր վասալի վասալը իր վասալն էր:

Կայսրության ուշադրությունը, բացի Թևոդոսուպոլսից և Տարոնից⁴, եղել է նաև Ապահունիքի (Մանազկերտ կենտրոնով) և դրանից հարավ՝ վանա լճի ափամերձ շրջաններում գտնվող Խլաթ, Արճեշ և Բերկրի ամրությունների վրա, քանի որ եթե սրանք «գտնվեն կայսեր ձեռքում, ապա պարսկական (արաբական — է. Դ.) զորքը Ռոմանիայի (Բյուզանդիայի — է. Դ.) դեմ դուրս գալ չի կարող, որովհետև ամրոցները, գտնվելով Ռոմանիայի և Հայաստանի միջև, պատենշի և զորակայանի դեր են խաղում»⁵:

Այս տեղիտորիայի պատմությունը մանրամասն տալիս է Միրանաժինը. «Մանազկերտին էր տիրում Ապելվարդը, որ գտնվում էր իշխանաց իշխան Աշոտի՝ իշխանաց իշխան Սմբատի հոր իշխանության ներքո»⁶: Հայտնի է, որ Բուղայի արշավանքից մեծագույնս օգտվեց «սուլայմ ցեղին պատկանող Մանազկերտի ամիրայական տունը (հայկական աղբյուրներում պարզապես՝ կայսիկ), որը Թ դարի 60-ական թթ. արդեն Ապահունիքի տերն էր»⁷:

Միրանաժինի հաղորդումից երևում է, որ Աբու-լ-Վարդդ Աշոտ Բագրատունու կողմից ինչ-որ ժամանակ ճանաչվել էր Մանազկերտի տերը⁸:

Կայսիկները, ինչպես ցույց է տալիս դեպքերի հաջորդականությունը, երբեք պատեհ առիթը չեն կորցրել դուրս գալու հայ նախարարների և հատկապես հայ Բագրատունի թագավորների դեմ: Երբ դեռևս ուժեղ էին Շալբանիները, կայսիկները, նրանց ուժն ու հովանավորությունը զգալով, դավեր էին

³ К. Н. Юзбашян, Повествование Аристарха Ластиверци и закат «Эпохи Багратидов» (автореферат докторской диссертации), Ленинград, 1975, էջ 14:

⁴ Գրիգոր Տարոնացին (898—923?) հնազանդություն է հայտնում կայսեր, իսկ 930-ական թթ. կեսերին եղնուտը, որը, ինչպես երևում է Միրանաժինի հաղորդումից, եղել է Տարոնի իշխանական տան ձեռքում, անցնում է կայսրությանը (Constantine Porphyrogenitus, De Administrando Imperio, ed. by Gy. Moravcsik, English transl. by R. J. H. Jenkins, Budapest, 1949, 43, 179—186, այսուհետև՝ D.A.I.):

⁵ D. A. I., 44, 125—128: «Օտար աղբյուրները Հայաստանի և հայերի մասին. Բյուզանդական աղբյուրները», Բ. Կոստանդին Միրանաժին, թարգմ. Բնագրից, առաջաբանը և ծանոթագրությունները Հր. Բյուրթիկյանի, Երևան, 1970, էջ 13 (այսուհետև՝ Կոստանդին Միրանաժին):

⁶ D. A. I., 44, 17—19: Կոստանդին Միրանաժին, էջ 10:

⁷ Տե՛ս Ա. Տեր-Ղևնդյան, Արարական ամիրայությունները Բագրատունյաց Հայաստանում, Երևան, 1965, էջ 96—97:

⁸ Հմմտ. նույն տեղում, էջ 97:

նյութում Աշոտ Բագրատունու և հայ իշխանների դեմ, սակայն հաջողության չէին հասնում¹⁰:

Շուրջ 880 թ. Աշոտ Բագրատունին գնում է Ապահունիք և պաշարում Մանազկերտը: Այդ մասին Թովմա Արծրունին գրում է. «Եւ զի էր պաշարեալ նորա յայնժամ զքաղաքն Մանազկերտ Ապահունեաց աշխարհին, որ ի ձեռս Աբլբա-ռայն էր, և առեալ հասուցեալ մերձ ի պաշարումն. և ի հասանել զուժկանացն¹¹ եթող զնոսա, տալով նոցա հրովարտակս ի խաղաղութիւն»¹²:

Այստեղ շատ կարևոր է հայ Բագրատունիների և կայսիկ ամիրայության պաշտոնական հարաբերությունների մասին հղած վկայությունը: «Հրովարտակս ի խաղաղութիւն» իր մեջ վարող էր մեծ իմաստ պարունակել: Ինչպես երևում է Աշոտը այդ հրովարտակով ճանաչել էր Մանազկերտին և շրջակա ամրոցներին տիրելու կայսիկների իրավունքները: Աշոտ Բագրատունին հրովարտակ տալու իրավունք ուներ, քանի որ 863 թ. նա իշխանաց իշխան էր: Այնպես որ մինչև պաշտոնապես թագավոր դառնալը նա շուրջ 880 թ. արդեն ճանաչել էր կայսիկների տիրակալական իրավունքները:

Ինչպես տեսնում ենք, Աշոտ Բագրատունու առաջնահերթ նպատակն էր նվաճել Մանազկերտը, սակայն այդ նրան չհաջողվեց: Այլ պարագաներում, եթե դա սովորական արշավանք լիներ և թեկուզ միայն պատժիչ, նա սնհաջողության դեպքում կհեռանար առանց պաշարվածների հետ որևէ բանակցությունների: Սակայն այդ ժամանակ նա փաստորեն արդեն երկրի տերն էր և չհնազանդեցված կայսիկներին կենտրոնական իշխանության հանդեպ ինչ-որ ստատուս էր անհրաժեշտ տալ: Ըստ երևույթին, Աշոտ Բագրատունին ավելի համար է գտնում կայսիկներին վասալական իրավունքով տիրակալ ճանաչել, քան թե իր երկրի համար շատ կարևոր ստրատեգիական դիրք զբաղող Մանազկերտի հետ անընդհատ պայքարի մեջ լինել: Այն, որ կայսիկները, որպես վասալներ, փաստորեն ծառայում էին Աշոտ I Բագրատունուն, երևում է Միրանաթինի հետևյալ հաղորդումից. «Իշխանաց իշխան Աշոտը այս Ապելվարդին տվեց նաև խիստ ամրոցը, Արզեսը և Պերկրին, քանզի արևելքի բոլոր շրջանները գտնվում էին վերոհիշյալ իշխանաց իշխան Աշոտի՝ իշխանաց իշխան Սմբատի հոր ձեռքում»¹³: Պարզ է, որ այս ամրոցները Աշոտ Բագրատունին շնորհել էր Աբու-լ-Վարդին «Հրովարտակս ի խաղաղութիւն» տալու ժամանակ կամ, որ ավելի հավանական է, դրանից հետո (այս ամրոցներից Բերկրինն ո՞նք ստորև կանդրադառնանք): Հավանաբար, նշված ամրոցները

¹⁰ «Թովմայի վարդապետի Արծրունույ Պատմութիւն տանն Արծրունեաց», Ս. Պետերբուրգ, 1887, էջ 218—222:

¹¹ Նկատի ունի Դերենիկի ձերբակալման մասին հղած լուրը: Դերենիկը ձերբակալվել էր վասպուրականի Սեան բերդում, Հասանիկ Արծրունու կողմից, որին այդ քայլին զրգել էր Տարոնի իշխան Բագարատ Բագրատունու ուղին՝ Աշոտ Կյուրապաղատը, վերջինս իր հերթին տուժել և մինչ այդ ձերբակալվել էր նույն բերդում Դերենիկի կողմից: Դերենիկի նպատակն էր իր փեսային՝ Աշոտ Կյուրապաղատի եղբայր Դավիթին Տարոնի իշխան դարձնել: Դերենիկի և Աշոտ Կյուրապաղատի միջև թշնամությունը ավելի էր սրում Մանազկերտի ամիրա Աբու-լ-Վարդը: Դերենիկի ձերբակալման լուրը ստանալով, Աշոտ իշխանաց իշխանը շտապում է օգնության հասնել իր փեսային: Աշոտ իշխանաց իշխանի միջնորդությամբ Հասանիկը ազատ է արձակում Դերենիկին, «պատանդ թողնալ զԳագիկ որդի Դերենիկին և որդի Գրիգորի Արծրունույ» (Թովմա Արծրունի, էջ 207, 220, 222—224):

¹² Թովմա Արծրունի, էջ 224:

¹³ D. A. I., 41, 19—23: Կոստանդին Միրանաթին, էջ 10:

կայսրիկներին հանձնելով Աշոտ I Բագրատունին նրանց վրա էր դնում երկրի այդ մասի պաշտպանությունը¹³։ Որ կայսրիկները վասալական կախվածության մեջ էին և զինվորական ծառայություն էին վատարում Աշոտ I-ի օրոք, երևում է այն բանից, որ հետագայում, Սմբատ I-ի թագավորության տարիներին, նրանք ապստամբում և հրաժարվում են այդ պարտականություններից. «Որդիքն Աբդուհամանի¹⁴, որ Կայսրիկքն անուանին՝ ապստամբեալ էին ի պետութենէ թագաւորին (Սմբատ I-ի — է. Դ.), տալ հարկս և զինուորեյ որպէս օրէն էր»¹⁵։

Հայաստանի տարբեր մասերում Աշոտ Բագրատունու ձեռնարկած միջոցառումները հաջողությամբ պսակվեցին, երկրում մի առ ժամանակ ստեղծվեց կայուն վիճակ, և նա Բագրատունյաց Հայաստանի թագավոր դարձավ (885/86—890 թթ.), ճանաչվելով խալիֆայության ու կայսրության կողմից¹⁶։

Աբու-լ-Վարդ I-ի մահից հետո «նրա տիրույթները անցան որդուն՝ Ապելխամիտին (Աբդ ալ-Համիդ — է. Դ.), իսկ Ապելխամիտի մահից հետո վերջինիս իշխանությանը տիրացավ նրա անդրանիկ որդի Ապոսեատան»¹⁷։ Այս անցքերը տեղի են ունեցել շատ կարճ ժամանակամիջոցում։ Սակայն պարզ է, որ Աբու-լ-Վարդը և Աբդ ալ-Համիդը եղել են Աշոտ I-ի և Սմբատ I-ի օրոք, սակայն ոչ ոչ քան վերջինիս գահակալման առաջին տասնամյակը, քանի որ X դարի սկզբին արդեն հանդես են գալիս Աբդ ալ-Համիդի որդիները, իսկ սրանց ապստամբության հետ կապված մի դրվագ բերում է Թովմա Արծրունին. «Ընդ այն ժամանակս զօրածոողվ եղև թագաւորն Հայոց Սմբատ ի վերայ Ապահունեաց աշխարհին... եւ գրէթէ ամենայն իշխանք Հայոց, Վրաց և Աղուանից եկեալ էին ընդ զօրս Հայոց ի վերայ աշխարհին Ապահունեաց... եւ անցեալ բանակեալ էին զօրքն Հայոց ի դաշտին Օշական»¹⁸ ի Մանազաւեան նահանգին¹⁹։

¹³ Արարական արշավանքների վտանգից բացի վիճակը վատթարանում էր նաև Տարոնի և Վասպուրականի իշխանական տների միջև տեղի ունեցող հակամարտության և, հատկապես, Վասպուրականի Արծրունիների կենտրոնախույս ձգտումների հետևանքով, որոնք 908 թ. հանգեցրին Վասպուրականի թագավորության ստեղծմանը։

¹⁴ Ինչպես ստորև Միրանաթինի հաղորդումներից կտեսնենք, այստեղ խոսք կարող էր լինել Աբու-լ-Վարդ I-ի որդու՝ Աբդ ալ-Համիդի որդիների՝ Աբու Սեդայի, Աբու-լ-Ասվադի և Աբու Սալիմի մասին։ Թովման, Աբդ ալ-Համիդի փոխարեն նշում է Աբդ ալ-Ռահմանին, ըստ երեւվելի, ոչ թե անունները շփոթելով, այլ միայն նրան իմանալով որպես Աբու-լ-Վարդ I-ի որդի, այնինչ սա պետք է նրա երկրորդ որդին լիներ, Ահմադի հայրը, որի մասին խոսում է Միրանաթինը։ Այնպես որ Թովման ոչ թե Աբդ ալ-Համիդին է կոչում «Աբդուհաման», այլ նա այդ երկուսից իմացել է միայն Աբդ ալ-Ռահմանին, որը թերևս միացել էր Աբդ ալ-Համիդի որդիների ապստամբությանը։ Նա, կայսրիկների մոտ զոյություն ունեցող ժառանգության կարգի համաձայն, չէր հաջորդել Աբդ ալ-Համիդին, որպես կայսրիկների բոլոր տիրույթների տիրակալ, քանի որ վերջինս չափահաս որդի ուներ։

¹⁵ Թովմա Արծրունի, էջ 245։

¹⁶ Հմմտ. ն. Ադոնց, Պատմական ուսումնասիրություններ, Փարիզ, 1948, էջ 85—86։

¹⁷ D. A. I., 44, 23—26։ Հմմտ. Կոստանդին Միրանաթին, էջ 10։

¹⁸ Օշական դաշտի տեղագրությունը Ապահունիքում տե՛ս «Тарон в древности и средние века» քարտեզում, հեղինակ Ս. Ս. Սրեմյան (Ղ. Վ. Այվազյանի «История Тарона» и армянская литература IV—VII веков» (Ереван, 1976) գրքում)։

¹⁹ Այստեղ նահանգի տնունը հիշատակվում է դրա հին տերերի՝ Մանավադյան իշխանների անունով։ Մանազկերտը հիշատակվում է նաև «Մանազկերտ», «Մանազկերտ» ձևով (Մանավադյանների մասին մանրամասն տե՛ս II Лопц, նշվ. աշխ., էջ 312 և հտ.)։

Իսկ որ տիրէր աշխարհին Ապահունեաց Կայսրին (Աբու Սեդան — է. Դ.)²⁰, զիւր զօրսն առ ինքն գումարեալ և որ շուրջ զնովսու քաղաքայինք և ասպատակքն Պարսից, որք ի Յունացն վերայ առնէին արշաւանս»²¹:

Այժմ անդրադառնանք այն իրական դրդապատճառին, որը այսքան զորք էր հավաքել Ապահունիքում:

Ինչպէս հայտնի է, Սմբատ I-ը ստիպւած էր իր դահակալման առաջին տարւանից մեծագոյնս հաշվի առնել երկու հարևաններին՝ Բյուզանդիային և Արաբական խալիֆայությանը: Նա այդ հարցում հետևում էր իր հոր՝ Աշոտ I-ի քաղաքականությանը, որը բխում էր օբյեկտիվ իրականութիւնից: Սմբատ I-ը Ատրպատականի ոստիկան Ափշինի միջոցով խալիֆից թագ ստացավ: Նա, շարունակելով իր հոր արտաքին քաղաքականութիւնը, Բյուզանդիայի կայսր Լևոն VI-ի (886—912) հետ մտերիմ հարաբերութիւնների մէջ է մտնում²²: Այդ ամեններն դուր չի գալիս Ափշինին, բայց Սմբատին հաջողվում է կասեցնել նրա արշավանքը բանակցութիւնների և նվերների միջոցով²³:

Ի ասպացույց հայ-բյուզանդական դաշինքի խոսում են նաև հետևյալ անցքերը: Սմբատ I-ը, Ատրպատականի սահմաններից վերադառնալիս, Դվինի դռները փակ է տեսնում և պաշարում է այն: Երկարատև պայքարից հետո նրան հաջողվում է վերցնել Դվինը, իսկ «զլխաւոր ոստիկանք և հրամանատարք քաղաքին՝ եղբարք երկու, որոց անուանք Մահմէտ և Ումայի՝ արտաքսելիալ դիշերի փախստեալք լինէին. զոր և զգացեալ և զհետ կրթեալ զօրացն և ձեռքակալ արարեալ՝ ածեն արքային: Եւ նորա տոռամբք կապանաց և վարոցօք զնոսա տանջեալ և առեալ ի նոցանէ բազում գանձս ոսկոյ և արծաթոյ՝ առ կայսր Լևոն երկաթի շղթայիւքն զնոսա առաքէ»²⁴:

Այսպիսով, մինչև 893 թ., այսինքն իր գահակալության երրորդ տարին, Սմբատ I-ը կարողացավ Բյուզանդիայի և խալիֆայության միջև իր թագավորութիւնը պահպանել ու նորից ճանաչվել, բայց և «վաստակեց» Ատրպատականի ամիրայի՝ Ափշինի, իսկ հետագայում նաև նրա հետնորդի՝ Յուսուփի թշնամութիւնը, որոնք պատեհ առիթը չէին կորցնելու Սմբատին կործանելու համար:

Դեպի Կարինի շրջանը բյուզանդական զորքի 895 թ. արշավանքը արաբների կողմից կարող էր դիտվել որպէս զործնական քայլ հայ-բյուզանդական դաշինքի ասպարեզում: Այդ արշավանքի մասին հաղորդում է Թովմա Արծրունին. «Յետ այսր (այսինքն Դվինի 893 թ. երկրաշարժից²⁵ հետո)՝ յերկրորդ ամի պաշարեն զԿարնային քաղաքն զօրքն Յունաց. և դարձեալ անդրէն ի

²⁰ Քանի որ սա էր եղբայրներից ավագը, ուրեմն կայսրիկների կենտրոնական իշխանութիւնը սրա ձեռքում էր, իսկ մնացած եղբայրները պետք է տիրէին մյուս ամրոցներին (հմտ. Ա. Տեր-Ղևոնդյան, նշվ. աշխ., էջ 120—121):

²¹ Թովմա Արծրունի, էջ 245—246:

²² «Հովհաննու կաթողիկոսի Դրասխանակերտցոյ Պատմութիւն Հայոց», Թիֆլիս, 1912, էջ 158:

²³ Նույն տեղում, էջ 159—160:

²⁴ Նույն տեղում, էջ 160—161: Հմտ. Ասողիկ, էջ 161:

²⁵ Տե՛ս նաև՝ Հովհաննես Դրասխանակերտցի, էջ 162: Ինչպէս հաղորդում է Դրասխանակերտցին, երկրաշարժից հետո Ափշինը ներխուժում է Հայաստան, սակայն Դողսի մոտ պարտվում է (էջ 166—169):

Արամ իւրեանց թողեալ գնացին»²⁶, Այլ հանգամանքների հետ մեկտեղ²⁷, ըստ երևույթին, հայ-բյուզանդական դաշինքի այս նոր դրսևորումը ավելի է բորբոքում Ափշինին և նա, երկրաշարժից հետո, Ուտիքի, Վիրքի, Գուգարքի վրայով երկրորդ անգամ գալով Հայաստան (մոտ 896 թ.), նվաճում է Կարս ամրոցը²⁸: Այս մասին Ասողիկը գրում է. «Ամիրայն Ափշին որդի Սաճին, որ էր ռատիկան ի Պարսս (նկատի ունի Ատրպատականը — է. Գ.), որ և պսակեաց զՍմբատ, մանաւանդ զշարեալ ընդ բարեկամանալն Սմբատայ Յունաց կայսերն՝ և ելեալ Ափշին յաշխարհս Հայոց՝ առնու զբերդն Կարուց, զերի վարեալ զազատս կանամբք և մանկամբք իւրեանց և ողորմելի տեսակաւ հասուցանել ի քաղաքն Դուին»²⁹: Սմբատը ստիպւած էր ծանր սլայմաններով հաշտություն խնդրել³⁰:

Հայ-բյուզանդական դաշինքը, անկախ կողմերի նպատակներից, արդեն ակնհիշ փաստ էր, որին ասպացույց պետք է լինէին նաև 901 թ. պատրիկ Լալակոնի և 902 թ. սխոլերի դոմեստիկոս մագիստրոս Կատակալոնի³¹ արշավանքները դեպի Կարին և Բասեն: Ինչպես Հայաստանում գտնվող արաբական տարրը, այնպես էլ դրսի հովանավորողները խիստ անհանգստացած էին Ադարի սկզբին Բյուզանդիայի և Հայաստանի միջև արդեն բավականին գործունե դարձած այդ դաշինքի հետևանքներից: Ամենայն հավանականութեամբ, այդ դաշինքը պակաս զեր չէր խաղացել նաև Ապահոնիքում Սմբատ I-ի գլխավորությամբ հայ-վրացա-աղվանական զորքի գումարման գործում: Իսկ արդեն պարզ է, թե ինչու էին հենց այդ ժամանակ արաբները «ի Յունացն վերայ առնելին արշաւանս»: Իսկ 902 թ. էր, երբ Կատակալոնի զորքը խոշոր արշավանք էր ձեռնարկել Կարինի և Բասենի վրայ: Հենց այդ նույն ժամանակ էր գումարվել հայ-վրացա-աղվանական զորքը: Բյուզանդացիները և նրանց դաշնակից հայերը, ըստ երևույթին, գիտեին, որ Բասենի ու Կարինի և, հատկապես, վերջինի պաշտպանութեան համար արաբները զորք կբերեն կայսիկների տիրույթի վրայով, որի կենտրոնը Մանազկերտն էր, ուստի ըստ նախօրոք մշակված ծրագրի և պաշտպանավորվածութեան Սմբատ I-ի գլխավորած հայ-վրացա-աղվանական զորքը կտրում է արաբական միացյալ զորքի ճանապարհը:

Անհրաժեշտ է նշել, որ Ա. Տեր-Ղևոնդյանը, որը նույնպես անդրադարձել է արաբական միացյալ զորքի մասին եղած հաղորդմանը, ճիշտ է այն հարցում, որ կայսիկները աստատմրեցին Սմբատի համար խառը ժամանակամիջոցում³². Սմբատի արշավանքը (895 թ.) Ահմադ Շաւրանիի դեմ անհաջող էր³³: Դրան

²⁶ Թոմմա Արծրունի, էջ 231:

²⁷ Դրանցից էին՝ մինչև երկրաշարժը Դվինի դրավումը, Սմբատ I-ի ընդհանրումը Շայրանի Ահմադի հետ (Ասողիկ, էջ 161: Հմմտ. Թոմմա Արծրունի, էջ 236—237: Ա. Տեր-Ղևոնդյան, նշվ. աշխ., էջ 116—120):

²⁸ Դրասխանակերտցի, էջ 177—178:

²⁹ Ասողիկ, էջ 161:

³⁰ Ուտ այդ սլայմանների պատանդ էին թողնում Սմբատի և նրա եղբոր՝ Սահակի ավագ որդիները (Թագածուանդ Աշոտը և նրա հորեղբորորդի Սմբատը), իսկ Թագավորի կրտսեր եղբոր՝ Շապուհի աղջիկը կնութեան էր տրվում Ափշինին (Դրասխանակերտցի, էջ 178—181: Թոմմա Արծրունի, էջ 241):

³¹ D. A. I., 45, 50—55: Կոստանդին Ծիրանածին, էջ 15:

³² Ա. Տեր-Ղևոնդյան, նշվ. աշխ., էջ 121—122:

³³ Թոմմա Արծրունի, էջ 236—238: Հովհաննես Դրասխանակերտցի, էջ 173—176: Ասողիկ, էջ 161: Ս. Ղեպ, Սմբատի հսկայական զորքով կատարած այս արշա-

հաջորդել էր Ափշինի հարձակումը, որի մասին վերը հիշեցինք: Պետք է նշել, որ այդ անցքերից մի քանի տարի էր անցել, երբ Սմբատը արշավեց իր հոր Բանակով: Ուրեմն այդ արշավանքը ուղղված էր ոչ միայն ապստամբների դեմ: Կարծում ենք, որ Սմբատ I Բագրատունին նախապես զիտելու Ապահոնիքում միացյալ արաբական զորքերի հավաքման մասին: Դրանով իսկ Սմբատի միացյալ զորքը գործում էր հայ-բյուզանդական դաշինքի շրջանակներում նախօրոք մշակված ծրագրի համաձայն: Սրանով ապահովվում էր Կատակսլոնի արշավանքը, որը, որքան կարելի է դատել Կոստանդին Միրանաժինի հաղորդումից, հաջող էր. «(Կատակսլոնը — է. Դ.) գալով Թեոդոսուպոլսի ամրոցը (ἐν τῷ καστρῷ Θεοδοσιουπόλεως — է. Դ.), ավարի առավ նրա շրջակայքը, ապա նաև նույն ձևով ավերելով Ֆասիանի երկիրը և նրա ամրոցները, վերադարձավ՝ սարակինոսներին մեծ վնաս հասցնելով»³⁴: Այստեղից երևում է, որ բյուզանդացիները մի որոշ ժամանակ տիրեցին Թեոդոսուպոլսին³⁵: Սմբատ I-ի արշավանքը, որով փակվեց Կարինի արաբներին օգնության շտապող արաբական միացյալ զորքի ձանապարհը, խոշոր նշանակություն ունեցավ բյուզանդացիների համար:

Արաբական զորքը ծանր սլարտություն մատնվելով փակվեց Մանագիկերտում: Թովմա Արծրունին գրում է. «Իսկ որք էին արգելալք ի քաղաքն՝ աղօթականս և պաղատանս առ մեծ իշխանն Աշոտ յղէին, զի համոզեցէ ի մէջ նոցա զխաղաղութիւն. զոր ոչ անփոյթ արարեալ լի բարեմտութեամբ յզփացեալն Աշոտ՝ խօսի ընդ թաղաւորին զխաղաղութիւն. զոր ոչ անունկնդիր լեալ ընդունի զհայցելիին, առնելով հարկս և պատանդս, և զբերդն Երիկաւ Հաղացովտի (Ազիովտի — է. Դ.), զոր հանեալ էր մանագաւեցոյն ի բերկրացոյն. նոցա հանեալ էր ի Գինունի ազգէն, ի զարմէ Մեծեծի Գնունոյ, ի Վասպուրական բաժնէ, նաև Բերկրի բաժին եղեալ էր Վասպուրականի. և դարձուցանէ անդէն առ բերկրացիսն, և ինքեանք դառնային մեծաւ յաղթութեամբ անպայման խնդութեամբ: Գործեցաւ այս ՅՄԱ թուականութեանս Հայոց և ի Դ ամի հայրապետութեանն Յօհաննու Հայոց կաթողիկոսի»³⁶: Այս հատվածը մանրամասն քննության է առել Ա. Տեր-Ղևոնդյանը³⁷: Այստեղ կցանկանայինք նշել հետևյալը. կարելի է ենթադրել, որ Երիկավ ամրոցն իր շրջակայքով (այսինքն Բերկրիի շրջակա տարածքի մի մասը) նվաճվել էր կայսրիկների կողմից դեռևս Աբու-լ-Վարդ I-ի ժամանակ, այն բանից հետո, երբ, ըստ Միրանաժինի, Աշոտը նրան էր հանձնել խլաթը և Արճեշը: Իսկ Բերկրիի մասին հաղորդման մեջ արտացոլվել է այն իրողությունը, որ Բերկրիի շրջանում գտնվող Երիկավի բերդը անցել էր կայսրիկներին: Միրանաժինը, հավանաբար, փաստ է ունեցել այն մասին, որ Բերկրիին պատկանող շրջանի մի մասը եղել է կայսրիկների ձեռքում և Միրանաժինի չափազանցությունը տվյալ դեպքում նրանում է, որ այդ մի մասը ներկայացրել է որպես Բերկրիի ամբողջ տարածքը և այն էլ՝ տրված Աշոտ I-ի կողմից: Ուրեմն Բերկրիի մասին Միրանաժինի հաղորդումը որոշ

վանքը իրերի բերումով նույնպես համընկնում է զեպի Կարին բյուզանդացիների կատարած արշավանքի հետ:

³⁴ Ս. Ա. I., 45, 50—55: Կոստանդին Միրանաժին, էջ 15:

³⁵ Հմմտ. «The Cambridge Medieval History», vol. IV, p. 1, Cambridge, 1966, էջ 715:

³⁶ Թովմա Արծրունի, էջ 246—247: Նշված թվականները համապատասխանում են 902 թ.:

³⁷ Ա. Տեր-Ղևոնդյան, նշվ. աշխ., էջ 122, 146:

շափով համապատասխանում է իրականությանը և ամենևին անհրաժեշտություն չկա դրանում միտումնավոր հավելագրում տեսնել:

Սմբատ I-ը և նրա զորավարները պարտության մատնեցին միացյալ արաբական զորքը և հնազանդության բերին կայսիկներին: Ամենայն հավանականությամբ, Սմբատը ոչ միայն ետ էր վերցրել և ութմանիկներին հանձնել Երիկավ բերդը, այլև կայսիկներին զրկել էր հլաթից և Արճեշից, քանի որ հետագայում, «երբ պարսից ամիրա Ապոսատայը ('Ասօսաթ — Յուսուփը — է. Դ.) գերի վերցրեց և գլխատեց Մեծ Հայքի իշխանաց իշխան Սմբատին, Մանցիկերտ ամրոցում նստող Ապոսևատան զրավեց հալիատ ամրոցը, Պերկրի ամրոցը և Արզես քաղաքը»³⁸: Պատահական չպետք է լինի, որ Աբու Սևադայի երկու եղբայրները և դրանցից Աբու-լ-Ասվադի [հոր]եղբորորդի և որդեգիր Ահմադը Ծիրանածինի կողմից հիշատակվում են Սմբատ I-ի եղբրական մահից (914) հետո: Դրա պատճառն այն էր, որ եղբայրները, Աբու Սևադայի հետ (902 թ. դեպքերը ցույց տվեցին, որ նրանք անհաջողության էին մատնվել) մասնակցելով կայսիկների տիրույթների ընդլայնման նպատակով կատարվող արշավանքներին, իրենց հերթին տիրացան որոշ տարածքների: «Ապոսևատայի երկրորդ եղբայրը՝ Ապուհսֆուհտը, և նրա [հոր]եղբորորդի և որդեգիր Ախմետը (Ահմադ — է. Դ.) գրավեցին հալիատ ամրոցը, Արզես ամրոցը և Ալցիկի ամրոցը... Ապոսևատայի և Ապուհսֆուհտի երրորդ եղբայրը՝ Ապոսևմիսը տիրում էր Յերմանցու ամրոցին ('Եջրման — պետք է համապատասխանի ինուսին, որը Սերմանց լեռան ստորոտում էր — է. Դ.) և նրա շրջակայքին...»³⁹:

Ինչպես տեսնում ենք, Ապահոսիքը Մանազկերտով և Բերկրին մնում են Աբու Սևադայի ձեռքում: Անհրաժեշտ է նշել, որ թեև, ըստ Ծիրանածինի, կայսիկների ակտիվացումը անմիջապես հաջորդում է Սմբատի մահվանը, սակայն պետք է ենթադրել, որ այդ տեղի էր ունեցել քիչ ավելի շուտ, քանի որ Սմբատը, Յուսուփի 903—910 թթ. արշավանքներից և 908 թ. վասպուրականում Գալիկ Արծրունու թագավոր դառնալուց հետո, կորցրել էր իշխանությունը հարավային շրջանների վրա⁴⁰ և Ծիրանածինի հաղորդումները պետք է վերաբերեն հենց սրանից հետո ընկած ժամանակաշրջանին:

Այս աղետալի ժամանակ հայ-բյուզանդական դաշինքի շրջանակներում կարծես թե օգնության փորձեր են արվում. «Արքայն Հոռոմոց Բարսեղ»⁴¹ իբրև լուալ զայս ոճիրս շարի զմեօք մածեալ՝ բազում զօրու հորդան տուեալ դալ յօգնականութիւն Սմբատայ՝ յանկարծակի ժամանեալ նմա ելք հասարակաց կենաց մարդկան և վախճանեալ, թագաւորէ ընդ նորա եղբայր նորուն Աղէքսանդր: Եւ ապա շփոթ աղմկի զնովաւ շուրջ պատեալ յապստամբողաց արանց՝ և նա ևս ոչ կարաց ժամանել յօգնականութիւն»⁴²:

Այսպիսով, Յուսուփի արշավանքով ոգեշնչված կայսիկները կարող էին

³⁸ D. A. I., 44, 50—54: Կոստանդին Ծիրանածին, էջ 11:

³⁹ D. A. I., 44, 55—57, 61—62: Կոստանդին Ծիրանածին, էջ 11:

⁴⁰ Այս ժամանակ պետք է վերանային ութմանիկները (հմտ. M. Canard, Histoire de la dynastie des Hamdanides de Jazirah et de Syrie, Alger, 1951, էջ 473, ահ'ա Ա. Տեր-Ղևոնդյան, նշվ. աշխ., էջ 146):

⁴¹ Ս. Մարտիրոս և Ա. Վասիլեր ճիշտ են նկատել, որ այստեղ Բարսեղ անվան փոխարեն պետք է լինեն լիներ (A. A. Васильев, Византия и арабы, С. Петербург, 1902, էջ 102, ծան. 2):

⁴² Դրասխանակերտցի, էջ 233:

ակտիվացած լինել 908 թ.: Հայաստանի համար այդ իսկույն ժամանակաշրջանում նրանք աստիճանաբար տիրույթների տեր ու անօրենն էին դարձել ու անվախացել, ինչպես երևում է Միրանաժինի հաղորդումից. «Իշխանաց իշխան Սմբատի Պարսկաստանի (իմա՝ Ատրպատականի — է. Դ.) ամիրայի կողմից սպանվելուց հետո [Ապոսևատան] իրեն համարեց Մանցիկերտ ամրոցի և մյուս ամրոցների ու շրջանների տերն ու տիրականը և անկախացավ»⁴³: Կայսրիկների անկախացման մասին եղած փաստը Հայաստանի համար այդ ժանր վիճակի առավել պերճախոս վկայությունն է:

Աշոտ II-ը իր գահակալության առաջին օրվանից շատ բարդ խնդիրների առջև էր կանգնել: Երկիրը մասնատված էր, և դա ոչ միայն ֆեոդալական ժամանակաշրջանին հատուկ հողատիրության ձևի, այլև երկրի ներսում արաբական ամիրայությունների գործունեության հետևանք էր⁴⁴: Այդ ուղղությամբ բուռն գործունեություն էր ծավալել Ատրպատականի Յուսուփը, որը Աշոտ Շապուհյանի գլխին Դվինում թագ ղնելով այնպիսի վիճակ ստեղծեց, որ Հայաստանում Աշոտ II-ի և Գագիկ Արծրունու կողքին հանդես եկավ նաև երրորդ թագակիրը: Պարզ է, որ երկրի կենտրոնական իշխանության համար այսպիսի ծանր պահին կայսրիկների համար բարենպաստ սլայմաններ էին ստեղծվել իրենց անկախ զգալու: Սակայն կայսրիկների անկախ վիճակը երկար չի տևում:

Աշոտ II-ի թագավորության սկզբնական շրջանում հայ-բյուզանդական դաշինքը նոր փուլ է թևակոխում: Գահակալության սկզբի տարիներին այնպիսի վիճակ էր ստեղծվել, որ Աշոտ II-ը Բյուզանդիայի օգնության կարիքն ուներ, իսկ Բյուզանդիային սեփական շահերը մղում էին Արևելք: Ստեղծված պայմաններում բնական ելքը եղավ այն, որ Աշոտ II-ը, գալով Կոստանդնուպոլիս, վերադարձավ բյուզանդական օժանդակ զորքով⁴⁵:

Բյուզանդական զորքի հաջորդ տարիների (922 և 927 թթ.) արշավանքները, զորավար Հովհաննես Կուրկուասի գլխավորությամբ, տեղի ունեցան Դվինի ուղղությամբ, իսկ 924 թ. նրա եղբայրը՝ Թեոփիլոսը արշավեց Բասենի վրա: Ռումանոս I-ի (920—944) օրոք Բյուզանդիան ուժեղացնում է իր ճնշումը արաբների վրա, արդեն իսկ հաշվի չնստելով իր նախկին դաշնակից Հայաստանի հետ: Ի դեպ, 922 թ. բյուզանդացիների դեմ կռվում էր Աշոտ II-ը, որը արաբների հետ պաշարվել էր Դվինում⁴⁶: Հաջորդ երկու տասնամյակներում կայսրությունը մեծ հաջողությունների է հասնում Մելիտինեի, Սամոսատի, Կարինի ուղղություններով:

931 թ. կայսրիկների դեմ Հովհաննես Կուրկուասի ձեռնարկած արշավանքը ավերիչ բնույթ է ունենում⁴⁷: Միրանաժինի մի հաղորդումից հետևում է, որ Հովհաննես Կուրկուասի արշավանքներից հետո կայսրիկները հարկատու էին դարձել կայսրությանը: Նա գրում է. «Իր մյուս երկու եղբայրներ Ապոսևատի և Ապոսևմիսի հետ (Աբու Սևադան — է. Դ.) [ստիպված եղավ] ենթարկվել կայսեր (քանդի սխոյերի դոմեստիկոսը համառ պայքար էր մղել ամրոց-

⁴³ D. A. I., 44, 26—29: Կոստանդին Միրանաժին, էջ 10:

⁴⁴ Ա. Տեր-Ղևոնդյան, նշվ. աշխ., էջ 126—127:

⁴⁵ Դրասխանակերտցի, էջ 292—293:

⁴⁶ Ասոդիկ, էջ 170:

⁴⁷ Ibn al-Athir, VIII, 173. Այս հաջողությունը հաջորդել էր Ատրպատականի կառավարիչ Մուֆիհիցի կրած պարտությանը (նույն տեղում, էջ 159: Տե՛ս Ա. Տեր-Ղևոնդյան, նշվ. աշխ., էջ 148):

11 Հանդես, № 1

ների գեմ, ասպատակել ու ավերել նրանց պատկանող շրջանները), հռոմայե-
ցիների կայսեր վճարելով իրենց ամրոցների և շրջանների համար նուե
հարկ»⁴⁸։ Նույն գլխում Միրանաժինը մի քանի անգամ ևս շեշտում է, որ Բյու-
զանդիան հպատակեցրել էր կայսիկներին։

Անհամապատասխանություն է նկատվում կայսիկների վերաբերյալ Մի-
րանաժինի հաղորդման մեջ. «Մանցիկերտ ամրոցը, Ապահունի երկիրը, Կորին-
և Խարկան (Հարբը— է. Դ.) ևս գտնվում էին իշխանաց իշխանի գերիշխա-
նության և տիրապետության ներքո, մինչև այն ժամանակ, երբ Մանցիկերտի
ամիրա Ապոսեատան իր երկու եղբայրներ Ապուլեսֆուեստի և Ապոսելմիսի հետ
հպատակություն հայտնեցին կայսեր, իրենց ամրոցների և շրջանների համար
նրան վճարելով հարկ»⁴⁹։

Ըստ Միրանաժինի կայսիկները «իշխանաց իշխանի» (հայոց թագավորի)
գերիշխանության և տիրապետության ներքո էին մինչև կայսրին հպատակու-
թյուն հայտնելը։ Անհամապատասխանությունը այստեղ է, քանի որ վերևում
նա գրում էր, թե Սմբատ I-ի սպանությունից հետո կայսիկները անկախացան՝
մինչև Դոմեստիկոսի արշավանքները և կայսրին հպատակվելը։ Հենց այս-
տեղ է պարզվում դրա իսկական պատճառը։ «Իմ վասալի վասալը իմ վա-
սալն է» թեզը հաստատելու համար Միրանաժինը ոչ թե Բերկրիի նկատմամբ
իրավունքներ է վերագրում կայսիկներին, ինչպես ընդունված է համարել
(վերը տեսանք, որ նա հիմքեր ուներ Բերկրին կայսիկներին համարելու),
այլ անմիջական կապ է ստեղծում Բաղրատունյաց Հայաստանին և Բյուզան-
դիային կայսիկների հպատակվելու միջև։

Միրանաժինի հաղորդումներից երևում է, որ սխոլերի դոմեստիկոս Հով-
հաննես Կուրկուասի արշավանքների ժամանակ, երբ կայսիկները հպատակ-
վեցին, երեք կայսիկ եղբայրները դեռևս կենդանի էին, որոնցից գլխավորը
Աբու Սևադան էր։

Ժառանգության հարցում առաջնությունը պատկանում էր Աբու Սևադա-
յի ընտանիքին, քանի որ նա էր Աբու-լ-Վարդ I-ի թոռը և Աբդ ալ-Համիդի
ավագ որդին։ «Ապոսեատայի մահից հետո,— գրում է Միրանաժինը,— Ման-
ցիկերտը և նրա շրջաններն ու ամբողջ տիրապետությունն անցավ Ապոսեա-
տայի որդի Աբդեռախիմի ձեռքը»⁵⁰։ Աբդ ալ-Ռահիմի⁵¹ մահից հետո Մանազ-
կերտ ամրոցին և վերոհիշյալ բոլոր շրջաններին տիրացավ նրա հորեղբայրը՝
Աբու-լ-Ասվադը, որը Աբդ ալ-Համիդի միջնեկ որդին էր⁵²։ Նրա մահից հետո
Մանազկերտին և վերոհիշյալ բոլոր շրջաններին տիրացավ Աբու Սևադայի
և Աբու-լ-Ասվադի երրորդ եղբայրը՝ Աբու Սալիմը⁵³։ «...Իսկ վերոհիշյալ

⁴⁸ D. A. I., 44, 40—45։ Կոստանդին Միրանաժին. էջ 10—11։

⁴⁹ Մինչ այդ Միրանաժինը նշում է. «Այս երեք ամրոցները (Խլաթը, Արճնը, Բերկրին—
է. Դ.) վերոհիշյալ իշխանաց իշխան Աշոտի Սմբատի հոր, երկրորդ Աշոտի և մագիստրոս
Ապասակի պապի ժամանակներից սկսյալ մինչև երկրորդ Աշոտի՝ իշխանաց իշխանի ժամանակ
գտնվում էին իշխանաց իշխանի գերիշխանության ներքո, և հարկ էին վճարում նրան» (D. A. I.,
44, 34—39։ Կոստանդին Միրանաժին, էջ 11)։ Այսինքն դրանից հետո մի առ ժա-
մանակ, նրանք անկախացան, ինչպես հետևում է վերը նշվածից։

⁵⁰ D. A. I., 44, 66—68։ Կոստանդին Միրանաժին, էջ 11։

⁵¹ Աբդ ալ-Ռահիմը անժառանգ է մահանում, իսկ նրա Ապելմուդե անունով եղբայրը ան-
չափահաս էր (D. A. I., 44, 90—91, 96—97)։

⁵² Ինչպես վերը տեսանք, Աբու-լ-Ասվադը և նրա խորհրդորդի և որդեգիր Ահմադը
տիրում էին Խլաթին, Արճնին և Արձկնին։

⁵³ Աբու Սալիմը, ինչպես վերը տեսանք, տիրում էր Հարբից հյուսիս-արևմուտք ընկած

Ախամետը, այն է Ապուլեսֆուետի [հոր] եղբորորդին և որդեգիրը, Ապուլեսֆուետի գիտությունը և համաձայնությունը տիրում է խիաթին, Արզեսին և Պերկրին, որովհետև Ապուլեսֆուետը, ինչպես ասվեց, որդի չունեն, և այս Ախամետին, իր եղբորորդուն և որդեգրին նշանակել էր իր ամբողջ կարողության, ամրոցների ու շրջանների ժառանգորդ»⁵⁴։

Պարզ երևում է կայսրիկների մոտ ժառանգության հաջորդականության կարգը։ Այսպես, Աբու-լ-Վարդ I-ին ժառանգում է ավագ որդին՝ Աբդ ալ-Համիդը։ Քանի որ վերջինս չափահաս որդի (Աբու Սևադա) ուներ, ուստի և կայսրիկների մոտ գոյություն ունեցող ժառանգության կարգի համաձայն նրան ժառանգեց Աբու Սևադան, այլ ոչ թե իր եղբայրը՝ Աբդ ալ-Ռահմանը։ Նույն կարգով Աբու Սևադային ժառանգում է որդին՝ Աբդ ալ-Ռահիմը և քանի որ սրա եղբայրը՝ Ապելմուզեն անչափահաս էր, Աբդ ալ-Ռահիմի մահից հետո կայսրիկների տիրությունները անցնում են Աբու-լ-Ասվադին՝ Աբդ ալ-Համիդի միջնեկ որդուն, որը մինչ այդ Ահմադի հետ տիրում էր միայն նշված ամրոցների շրջանին։ Աբու-լ-Ասվադին հաջորդում է կրտսեր եղբայրը՝ Աբու-սալիմը։ Պարզ է, որ Ահմադին էր մնում այն տարածքը, որը նա Աբու-լ-Ասվադի հետ միասին գրավել էր դեռևս Աբու Սևադայի կենդանության ժամանակ։ Այսինքն, ըստ ժառանգման ավագության կարգի Աբու-լ-Ասվադի տիրությունը ավագ եղբոր կենդանության օրոք հանդիսանում էր խլաթ, Արճեշ և Արծկե ամրոցների, ինչպես և նորից նվաճված Բերկրիի շրջանը, որի վրա և Աբու-լ-Ասվադը տիրակալ է նշանակում Ահմադին։ Հետևաբար բնական է, որ Աբու Սալիմին պետք է ժառանգեր նրա որդին, որի մասին Ծիրանածինը պատմում է. «Ապուսելմեսի մահից հետո Մանցիկերտ ամրոցին և նրա շրջակայքին տիրացավ նրա որդի Ապելվարդը։ Իսկ Ախամետը տիրացավ խիատ, Արզես և Ալցիկե ամրոցներին»⁵⁵։ Ծիրանածինը դարձյալ մեկ անգամ նշում է. «Ախամետը ևս կայսեր ժառան էր, ինչպես և վերևում ասվեց և նա հարկ էր վճարում [կայսեր]...»⁵⁶։

Ինչպես տեսնում ենք, համարյա մինչև 940-ական թթ. կայսրիկները այսպես թե այնպես կատարել են որոշ պարտավորություններ կայսրության հանդեպ։ Աբու-լ-Վարդ II-ի հանդես գալուց հետո այդ վիճակը կտրականապես փոխվում է։ Ծիրանածինը գրում է. «Ապելվարդը նենգությամբ և խաբեությունամբ սպանեց նրան (Ահմադին — է. Դ.) ու խլեց նրա երեք ամրոցները՝ խիատը, Արզեսը և Ալցիկեն»⁵⁷։ Աբու-լ-Վարդ II-ը բռնի ուժով տիրացավ Ահմադի իշխանության տակ գտնվող բերդերին բավական խառն իրադարձությունների ժամանակաշրջանում։ Դրան նախորդել էին 939 և 940 թթ. համադանյան Սալֆ ալ-Դաուլայի արշավանքները Հայաստանի արևմտյան շրջանների վրա⁵⁸, որոնց ընթացքում նրան հաջողվեց որոշ նվաճումներ կատարել, ինչպես նաև կախվածության մեջ գցել մի շարք տեղական իշխան-

շրջանին՝ Սերմանց լեռից (Մարտի 1955) արևելք ընկած շրջակա տարածքին (հմտ. J. Markwart, Südarmenien und Tigrisquellen, Wien, 1930, էջ 305)։

⁵⁴ D. A. I., 44, 100—105, Կոստանդին Ծիրանածին, էջ 12։

⁵⁵ D. A. I., 44, 106—109, Կոստանդին Ծիրանածին, էջ 12։

⁵⁶ D. A. I., 44, 110—111, Կոստանդին Ծիրանածին, էջ 12։

⁵⁷ D. A. I., 44, 112—114, Կոստանդին Ծիրանածին, էջ 12—13։

⁵⁸ А. Васильев, *Узл. азбу.*, Приложение, էջ 83, Ибн-Зафир, fol. 2v, Ա. Տեր-Ղևոնդյան, *Նշվ. աշխ.*, էջ 151—152։

ների ու ամիրանների և դրանով էր հիմնականում պայմանավորված 940 թ. Կողոնիայի վրա կատարված արշավանքի սրընթացությունը: Սալֆ-ալ-Դաուլայի Հայաստանում եղած ժամանակ խնդրո առարկա հարցի առնչությամբ մեզ հետաքրքրում է Իբն-ալ-Ազրակի հաղորդման հետևյալ հատվածը. «Եվ կանչեց (Սալֆ-ալ-Դաուլան — է. Դ.) Ահմադ իբն Աբդ ալ-Ռահման Աբու-լ-Մուիզզին՝ Խիլաթի, Դատ ալ-Ջաուզի (Արծկե), Արշիշի (Արճեշ) և Բարքարիի (Բերկրի) տիրոջը, Աբդ ալ- Համիդին՝ Մանազքիդի (Մանազկերտ) և Գաշտ ալ-Ուարթի ու ալ-Հարթի տիրոջը... Ահմադ իբն Աբդ ալ-Ռահմանից առավ Բադլիսը (Բադեշ) շրջակայքով...»⁵⁹: 940 թ. կենդանի էին մնացել վերոհիշյալ Ահմադը, որը ընդարձակել էր իր տիրույթը և նույնիսկ տիրում էր Բադեշին⁶⁰, իսկ կայսիկ եղբայրներից միայն Աբու Սալիմ իբն Աբդ ալ-Համիդը⁶¹: Հաղորդումներից երևում է, որ Ահմադի իշխանության տակ էր գտնվում նաև Բերկրին: Թեև Համդանյանները այլ իշխանությունների տարածքների հետ միասին ստացան նաև մի ամբողջ կայսիկներից՝ Բադեշը, այնուամենայնիվ, տվյալ ժամանակաշրջանում Համդանյանների՝ ձեռնարկումների կայսիկների համար որոշ առումով նպատակահարմար էին: Քանի որ Հայաստանում գտնվող արաբների դիրքերը ամրապնդվում էին: Պետք է նշել, որ եթե Սալֆ ալ-Դաուլայի 939—940 թթ. արշավանքների օրոք Ահմադը կենդանի էր, ուրեմն նա Աբու-լ-Վարդ II-ի կողմից պետք է սպանված լիներ 940 թ. հետո: Իսկ Ծիրանածինից իմացանք, որ Ահմադը կայսրության հարկատուն էր: Այսպիսով, ըստ Ծիրանածինի, կայսիկները կայսրությանը հնազանդվել էին Կուրկուասի 920-ական և Սալֆ-ալ-Դաուլայի 939—940-ական թթ. արշավանքների միջև ընկած ժամանակաշրջանում: Վերջին արշավանքներից հետո Ահմադը, բնական է, որ պետք է դուրս եկած լիներ կայսրության գերիշխանությունից. սակայն Ծիրանածինը նրա վախճանությունը հասցնում է մինչև սպանվելը: Նույնիսկ կարելի է ասել, որ կայսրությունն ընդհանրապես, ինչ-որ մի ամբողջական ժամանակահատվածում իր գերիշխանությունը չի տարածել կայսիկների վրա, այլ այն կրել է էպիգոգիկ բնույթ, անմիջականորեն կապված լինելով Կուրկուասի արշավանքների հետ: Իսկ ի ապացույց կայսրության քաղաքական դոկտրինայի Ծիրանածինը այնպես է ներկայացնում, թե կայսիկները առնչվազն երկու տասնամյակ եղել են կայսրության գերիշխանության տակ: Մինչդեռ կայսիկները, ըստ երևույթին, Հովհաննես Կուրկուասի ամեն մի արշավանքից (927, 931) հետո միայն որոշ ժամանակ են հարկ վճարել կայսրությանը: Այլ կերպ չի կարելի բացատրել նրանց դեմ Բյուզանդիայի կողմից ձեռնարկված մի քանի արշավանքները:

942 թ. Հովհաննես Կուրկուասը գալիս է Հայաստանի հաբավային շրջանները⁶²: Նրա արշավանքը 942 թ. դեպի հյուսիսային Միջագետք պետք է ըն-

⁵⁹ Նույն տեղում, էջ 152—153:

⁶⁰ J. Markwart, նշվ. աշխ., էջ 456:

⁶¹ Առաջարկված է տեղստում Աբդ ալ-Համիդի անվան առջև ավելացնել «Իբն», այսինքն դարձնել՝ որդի Աբդ ալ-Համիդի (M. Canard, Les Hamdanides et l'Arménie, Annales de l'Inst. d'études Orient, Alger, 1948, VII, էջ 88. Ա. Տեր-Ղևոնդյան, նշվ. աշխ., էջ 154). հմտ. Constantine Porphyrogenitus, De Administrando Imperio, ed. by R. J. H. Jenkins, vol. 2. London, 1962, էջ 169:

⁶² Ա. Վասիլևը գրում է, որ նա գրավեց Վանի հյուսիսային ափին գտնվող Արզան քաղաքը և ապա հույները ռազմական գործողությունները տեղափոխեցին Վերին Միջագետք (նշվ. աշխ., էջ 250): Ակնհայտ է, որ խոսքը Աղձնիքի Արզանի մասին է: Ա. Վասիլևը այս Արզանը չփո-

թագած լինելը Մելիտինե—Արածանիի հովիտ—Ձորա պահակ—Բաղեշ—Ար-
ուան—Նիրկերտ (Մայաֆարկին)—Դիարբեքիբ—Մծբին—Եդեսիա (պաշարում
է)—Ռաշ-Այն գծով, իսկ վերադարձը՝ հյուսիսային Ասորիքով⁶³:

Հաջորդ տարիների դեպքերը ցույց են տալիս, որ Համդանյանները այլևս
ժամանակ չունեցան զբաղվելու Հայաստանում, Աղձնիքից հյուսիս, 939—
940 թթ. նվաճված տարածքով: Այնպես քի իրենց հերթին, կայսիկները ինչ-որ
չափով անկախացել էին: Վիճակը նրանց համար առավել ևս նպաստավոր էր,
քանի որ 940-ական թթ. կեսերից (Ռոմանոս I-ի մահից հետո) Բյուզանդիայի
ուշագրությունը մի առ ժամանակ այդ մասերից շեղվել էր: Ըստ երևույթին, այս
ժամանակահատվածում է, որ Աբու-լ-Վարդ II-ը սպանեց Ահմադին և
միանձնյա տեր ու տնօրեն դարձավ կայսիկների տիրույթների վրա:

Աբու-լ-Վարդ II-ը 964 թ. նախա զորավարից կրած պարտությունից հե-
տո մահացավ⁶⁴: Սայֆ ալ-Դաուլան ևս մեկ անգամ կարողացավ Հայաստան
դալ «գրավելու կայսիկների քաղաքները և վերադարձավ 966 թ. հունվար
ամսին»⁶⁵:

Սայֆ ալ-Դաուլան մինչ Հայաստանի վրա արշավելը Նիրկերտում սպա-
նել էր տվել նախային: Ինչպես տեսնում ենք, Համդանյանները տիրում են կայ-
սիկների նախկին տիրույթներին, սակայն մինչև 967 թ., երբ մեռավ Սայֆ
ալ-Դաուլան⁶⁶: Սրանից հետո այս տարածքի ստատուսի մասին ստույգ տե-
ղեկություն չկա: Ըստ Ասողիկի 968 թ.⁶⁷ և ըստ Իբն-ալ-Ասիրի 969/970 թթ.⁶⁸
Նիկեիոր կայսեր եղբորորդին՝ Վարդ Փոկասը պաշարեց Մանազկերտը և
գրավելուց հետո հիմնահատակ կործանեց նրա պարիսպները:

974 թ. կայսր Հովհան Չմշկիկը Ամիդի վրա արշավելիս «կամեցաւ զմուտս
յաշխարհն Հայոց առնել»⁶⁹: Աշոտ III-ի զորքը բանակել էր Հարքում⁷⁰, ուր այն
կարող էր գալ Բագրևանդի և Ապահունիքի վրայով: Աշոտ III-ը Ապահունիքը
և Հարքը նորից պետք է Բագրատունյաց Հայաստանի կազմը մտցրած լինել
969—975 թթ. միջև, քանի որ Մեծ Հայքի հարավ-արևմտյան մասում Համ-
դանյանների տեղում հաստատված Մրվանյանների քրդական ամիրայությունը
իր գոյության առաջին իսկ տարվանից սկսում է ընդարձակվել դեպի հյուսիս:

Մրվանյան Բատի առաջին նվաճումներից եղել են Նիրկերտը, Խլաթը⁷¹,
իսկ Իբն ալ-Ասիրի հաղորդումից երևում է, որ նաև Արճեշը⁷², որին հաջորդել

թում է Կարինից հյուսիս գտնվող Արծն քաղաքի հետ: Այս շփոթումը, կարծում ենք, հետևանք
էր այն բանի, որ «XI դարի վերջից, սելջուկների կողմից Արծն քաղաքի կործանումից հետո,
Կարինը կոչվում էր նաև Arzan-ar-Rum, որից՝ Արզրում և այժմյան էրզրում» (Ս. Երեմ-
յան, Հայաստանը ըստ Աշխարհացույցի, Երևան, 1963, էջ 58):

⁶³ Բյուզանդացիների հաջողությունները այս ժամանակաշրջանում պայմանավորված էին
Սայֆ ալ-Դաուլայի խիստ զրազվածությամբ այլ տեղերում:

⁶⁴ Ա. Տեր-Ղևոնդյան, նշվ. աշխ., էջ 157:

⁶⁵ Նույն տեղում:

⁶⁶ Նույն տեղում, էջ 158:

⁶⁷ Ասողիկ, էջ 183:

⁶⁸ Ibn al-Athir, VIII, 445, տե՛ս Ա. Տեր-Ղևոնդյան, նշվ. աշխ., էջ 185:

⁶⁹ Մատթեոս Ունհայեցի, Ժամանակագրություն, Վաղարշապատ, 1998, էջ 17:

⁷⁰ Նույն տեղում:

⁷¹ Ասողիկ, էջ 192:

⁷² Ibn al-Athir, IX, 25 (տե՛ս Ա. Տեր-Ղևոնդյան, նշվ. աշխ., էջ 193):

էր Մանազկերտը մոտ 976 թ.: Ինչպես տեսնում ենք, Բատը տիրանում է Համդանյանների ու նաև Կայսիկների նախկին տիրույթներին: Եվ նախորդների նման նրա շահերը, բնականաբար, բախվում են Բյուզանդիայի նվաճողական շահերին: Վարդ Սկլերոսի ապստամբության ժամանակ «Խլաթայ և Նփրկերտոյ ամիրայն Բատն վերստին շինէ զքաղաքն Մանազկերտ. և սրով և գերութեամբ անմարդացոյց զգաւառն Տարօնոյ, յաւարի առեալ զքաղաքն Մուշ»⁷³:

Դավիթ Կյուրապաղատը միայն Բատի մահվանից հետո (990 թ.) է կառուցում տիրել Մանազկերտին: Այնուհետև ամիրա Մամլանը արշավելով հասնում է Ծաղկոտն, բայց տեսնելով հայ-վրացական միացյալ զորքը, չի համարձակվում մարտի բռնվել և հեռանում է⁷⁴:

Այսպիսով, Դավիթ Կյուրապաղատին միայն X դարի վերջին տասնամյակում է հաջողվում նվաճել Ապահունիքը Մանազկերտ կենտրոնով, ինչպես նաև, ամենայն հավանականությամբ, Հարբը: Սակայն այդպես հեշտությամբ Մրվանյանները չէին հրաժարվի իրենց համար չափազանց կարևոր հենակետ հանդիսացող Մանազկերտից: Առջևում դեռևս 998 թ. Ծումբի ճակատամարտն էր⁷⁵, որից հետո միայն կարելի է խոսել Դավիթի կողմից Ապահունիքին տիրելու մասին: Սակայն Դավիթը 1000 թ. մահացավ և նրա տիրույթները անցան Բյուզանդիային:

Այսպիսով, Մանազկերտը և հարևան տերիտորիաները եղել են արաբա-բյուզանդական պայքարի հանգուցակետերից մեկը: Պայքարը այս շրջանին տիրելու համար X դարի առաջին քառորդից ավելի է սրվում, որովհետև Բյուզանդիան, օգտվելով խալիֆայության քայքայումից, խորանում է դեպի արևելք և ձեռնարկում «Սուղուրի» թիկունքային գոտին նվաճելուն: Նշված տերիտորիայի կարևորությունով էր պայմանավորված նաև այն, որ կայսիկների շուրջ հարյուրամյա տիրապետության օրոք պայքարը չթուլացավ: Կարելի է ասել, որ հիշյալ տերիտորիան X դարում Արևելքի ամենաբարդ միջազգային կոնֆլիկտների կետերից մեկն էր: Ուստի պատահական չէ, որ գտնվելով կայսիկների ձեռքում, պարբերաբար ենթարկվում էր հայ Բագրատունիներին և Բյուզանդիային, իսկ կարճատև ժամանակ՝ նաև Համդանյաններին: X դարի երրորդ քառորդում որոշ ժամանակ նորից անցնում է հայ Բագրատունիներին, սակայն հետո քուրդ Մրվանյանների բաժինն է դառնում: Վերջիվերջո Դավիթ Կյուրապաղատի միջոցով նրան տիրանում է Բյուզանդիան: Եվ վերջապես, այս շրջանի կարևորության մասին ամենից պերճախոս վկայությունն այն է, որ կայսրությունը, 1071 թ. ալստեղ պարտություն կրելով թուրք-սելջուկյան հրոսակախմբերից, ալլևս ի վիճակի չեղավ վերականգնել իր դիրքերը Արևելքում և այդ պարտությունով սկիզբ դրվեց Բյուզանդական կայսրության անկմանը:

⁷³ Ասողիկ. էջ 192: Վարդ Սկլերոսի ապստամբության և Բատի այս ավերիչ արշավանքի ժամանակ է, որ Վասիլ II-ը Դավիթ Կյուրապաղատից օգնություն է խնդրում, փոխարենը խոստանալով վերը նշված տարածքները: Վարդ Փոկասի պարտությունից (989 թ.) հետո է, որ Դավիթը ստիպված է լինում ոչ միայն կայսրությունից «նվեր» ստացած, այլ նաև իր իսկ սեփական տիրույթները կտակել Վասիլ II-ին:

⁷⁴ Ասողիկ. էջ 266—267:

⁷⁵ Նույն տեղում, էջ 271—273:

МАНАЗКЕРТ В СФЕРЕ АРАБО-ВИЗАНТИЙСКОГО ПРОТИВОБОРСТВА

(Вторая пол. IX—X вв.)

Э. Л. ДАНИЕЛЯН

(Резюме)

Ашот I Багратуни (886—890), еще будучи «князем князей» Армении, в 880 г. особой грамотой признал владетельные права кайсиков на Маназкерт и близлежащие крепости на условиях вассалитета. При Смбате I Багратуни (890—913) в конце IX в. кайсики восстали. Целью похода Смбата I на Маназкерт в 902 г. было не только усмирение кайсиков, но и задержание по заранее выработанному с византийцами плану объединенного арабского войска, спешившего на помощь арабам Карины, куда совершил поход доместик схолл Катакалон.

Кайсики снова выходят из-под вассальной зависимости армянских Багратидов, вероятно, не после смерти Смбата I, как сообщает Константин Багрянородный, а немного раньше, в 908 г., воспользовавшись опустошительным походом эмира Атрпатакана Юсуфа.

В результате походов Иоанна Куркуаса кайсики, видимо, на короткое время подчинялись империи. Эпизодический характер носил поход Варда Фоки на Маназкерт в 969 г. Притязания империи на территории кайсиков выражались, с одной стороны, согласно принципу «вассал моего вассала — мой вассал», если кайсики рассматривались как вассалы армянских Багратидов; с другой стороны, считалось, что они находятся в прямой зависимости от империи, так как имперские войска завоевывали их земли (что, однако, носило временный характер). В этом отношении не случайно, что за помощь, ожидаемую от Давида Куропалата для подавления восстания Варда Склиры (976—979), Василий II наряду с территориями, до этого времени так или иначе аннексированными империей, обещает также Харк и Апахуник, которые еще предстояло отнять у Мерванидов. Эти области снова отошли к армянским Багратидам между 969—975 гг.

Только в конце X в. Давид Куропалат на короткое время окончательно завоевал у Мерванидов обещанные ему империей территории в этой части Армении, которые вместе с его собственными владениями перешли после его смерти в 1000 г. к империи согласно оставленному им завещанию.

Значение Маназкерта и окружающих его территорий как важного военно-стратегического региона подчеркивается также последствиями поражения, которое империя потерпела от турок-сельджуков в битве при Маназкерте в 1071 г.